


1387

雲

溪

集

二



膳錄監生 臣汪麟

膳錄監生 臣尹大謙

欽定四庫全書

雲溪集卷四

宋 郭印 撰

五言古詩

遊大隋山

我聞大隋名夢寐猶記錄得檄天彭道喜氣和可掬出
城六十里崎嶇轉江曲山門忽斗上危步依筇竹崩石
帶烟雲異草羅澗谷寂鳥下窺人纍猿時挂木路窮纔
見寺金碧煥雙目祖師古定光燈冷無人續開公生異

世大事如付囑僧言山長陰朝暮雲容戲茲辰為我晴
疊岫堆濃綠虛閣倚秋風一洗塵土俗舉手揖丹景損
身跨白鹿十年勞問訊親到心始足坐久燭漸微借榻
雲間宿山寒寐不成窗外泉鳴玉

全蜀藝文志 案此一
首係宋詩紀事所

戴令採
錄補入

題李彥澤紫雲洞

老李天中仙一念人間世簪裳四十秋不取公卿位星
斗爛文章日月懸忠義緣斷還帝鄉飄飄若蟬蛻玉骨

瘞高丘乃其所卜地山川暨草木拱揖浮蒼翠向來峰
之巔勃鬱蟠紫氣神物常護持景色多秀異郎君久慕
道泥滓唾聲利石洞琢青苔萬古開天秘非關痼烟霞
稍欲遠朝市要棲老仙靈以奉香火事不知騎鯨去塵
宇寧俯視洞兮既清幽且盡人子志

龍淵

脩竹不知數雲藏小渭川亭沼經營初觀者日駢闐者
舊為我語中有一龍淵時時見怪象吐氣如長烟漁人

或艤舟樵牧不敢前茲實總角時耳聆父老言相攜示
其處止水涵青黥沈沈不見底似有蛟蛇蟠我時心語
口龍豈居其間江湖非不廣而此棲蜿蜒有無未可知
疑信空相傳皇天儻困汝時至須騰騫滄溟可以家一
徙窟宅慳變化作霖雨滌蕩驕陽愆

和元汝功江臯感懷

奸諛同一轍舉世誰與歸溪山有佳趣此樂知者稀悠
然遠冒弋魚潛鳥高飛不作無根雲蒼狗變白衣使君

見幾早萬事已覺非拏舟漾清波策杖登高崎逍遙興
未已烟霞收夕霏身從麋鹿遊心與塵垢違惜哉經綸
手把釣渭水湄冷眼笑紛紛甘貽肉食譏強敵猶張王
屠滅煩天威要取虞淵日咸池浴明暉願君投緡竿風
雲起苔磯雍容坐帷幄密勿旋樞機莫學西山卧窮年
空采薇

泛舟至臨江院

清江借篙師津流不須問行行鏡中天水鳥嗔人近絕

岸得危亭一目千里盡山川草木妍造物無少吝誰知
天壤間眇然一方寸

十一月四日陪諸公游神泉南山院二十韻

官閒訪招提偶作南山遊門前喬木陰蒼藤掛髯虬野
僧出迎我貌古氣且柔相將入壺中水竹淨雙眸萬竿
團脩翠一溪皺橫流長橋翼方沼髣髴疑行舟角門通
細路崎嶇上層丘樹色老欲瞑風聲寒自颼佛閣瞰澄
碧下有百丈湫客言龍所邑不受魚與魴行行更小亭

羅坐得小休石罅流清泉甘冷無與儔濯足夫豈敢洗
耳良末由自憐山中人十載冠壓頭公檄聽奔走端似
置書郵惟有烟霞疾沈繇未肯瘳邂逅愜幽懷落日尚
遲留五斗奚堪戀十畝亦易求要希陶淵明投綬事農
疇超然傲塵世知命復何憂

遊楊村仁王院二十韻

山行不作懶杖策窮幽邃崎嶇十里餘乃得桃源地竹
樹翳以鮮峯巒秀而媚嬌雲弄奇姿啼鳥含幽意周遭

帷幄中一帶江流駛始知造物慳異境亦所秘行行松
門深鐘磬出蕭寺殘僧五六輩相顧各猜異湏臾問訊
通顏色頗夷粹高堂清風多起我無窮思提攜更小庵
清絕非人世自憐學宦游十載沉卑位功名與丘壑兩
計皆未遂時變攪中腸憂端叢千蝟豈如山間僧了無
秋毫累一榻寄巖阿烟霞為活計脫身名利塵洗耳市
朝事茲遊成邂逅頗與宿心契晚日下層巔躊躇聊自
慰重來定何時往往先夢寐

普慈郡池板橋頽壞更為石橋

蓮塘十畝方中作長橋渡荒荒歲月老烈烈風雨蠹板
面拆已穿梁脊橈而腐我來日曳杖往往不能步平生
歷險危所至靡驚懼唯持忠信行似有神物護但憂強
童子失足或顛仆乃伐南山石甃成如砥路曾微十日
勞遂享百年固悵昔用材力其費一何巨前人豈不思
襲舊終莽鹵作詩示兒曹萬事長要慮

放步園林得俗字韻

林稀怨秋風松柏未改綠偷閒挈杖來小逕緣詰曲鳥
鳴契深心山色供遐矚欣然若有獲一蕩塵襟俗平生
本逸放誰信簡書束失身名宦場冠冕成桎梏老驥欲
何之鹽車終局促求仁又焉貪知足乃不辱納納乾坤
大胡為自躋跼歸歟倘成賦矯首雲中鵠

次韻仲明舉西郊別墅

我聞脩竹陰清邃不受暑安得十畝餘其中創幽墅日
長惟鳥聲晝靜無人語習習來微風蕭蕭墮寒雨呼兒

出柴扉垂綸坐沙渚斯志久未遂世路今彌阻新詩何
起予風味勝清醕自憐拘一官隱逸愧前古好夢只林
泉羈蹤猶糞土豈能學貪夫忘身徇圭組

前十三章未見營創之意因成古風

紛紛世間法失得隨所寓有心不吾來無以不吾拒敝
帚貴千金窮閭封萬戶成理先默定疇能測其故我生
麋鹿姿林壑所忻慕抗志老淵明早卜柴桑住蓬門直
清江傍有萬竹塢捐金買尋丈地主牢不許往來二十

秋垂涎焦肺腑誰歟誘其衷百畝倏見予雲棲眇空明
似有神物護入林兩腋風步武覺輕舉三徑手自開一
一通幽處取勝著新亭揭名非苟取遐光遠山入靜聽
珍禽語園花四時春岸木千年古昔也荆榛場今焉瓊
玉府清境世所無金谷誰比數再拜天之賜從茲謝簪
組名宦空疲人視此真糞土

治園

故園別日久歸來三徑荒叢竹壞新壁枯荷掩幽塘滿

地葉狼籍草木為不芳
兒童力併除百卉儼成行
遙岑出蔥菁清波皺滄浪
一朝舊觀還林壑愈爭光

掃徑

陰森百畝林所向無不好
俗客豈曾來幽處通蓬島
一色盡琅玕堅潤真可寶
天風時脫葉滿徑堆殘槁
適然賓客至課奴先痛掃
要使吾心淨置之勿復道

留客

田廬欠過從每與樵漁
伍胷中抱鬱鬱舌在不能吐
佳

客忽顧我苦留終日語林間喜徜徉縱古評今古所具
只村醪水竹當邊俎臨去約重來一笑便相許

負暄

儒生習氣深寒陋渾未除茅簷負晨曦暖入四體舒怡
然得真趣自謂世所無不知華屋下繡茵圍紅爐風霜
攪乾坤凍死盈路隅無計凌空去雲間留日車

臨流

長江一鏡淨豈但燭鬚看清光瑩我心雙鬢任如絲鷗